



Broj, 01-07-10-51-203/2024  
Sarajevo, 21.8.2024. godine

Na osnovu člana 26. stav (4) i člana 19. stav (5) Zakona o slobodi pristupa informacijama na nivou institucija Bosne i Hercegovine („Službeni glasnik BiH“, broj 61/23) i člana 5. Pravilnika o postupanju po zahtjevu za pristup informacijama Visokog sudskog i tužilačkog vijeća Bosne i Hercegovine br. 08-02-3075/2010 od 2.9.2010. godine, 08-02-3645/2013 od 24.9.2013. godine, 08-02-388-1/2014 od 22.1.2014. godine i 08-07-2-3459/2021 od 29.9.2021. godine, rješavajući po zahtjevu za pristup informacijama Muzaferre Slomić [REDACTED] od 6.8.2024. godine, predsjednik Visokog sudskog i tužilačkog vijeća Bosne i Hercegovine donosi

## RJEŠENJE

**I Odobrava se** pristup kopiji anonimizirane disciplinske tužbe Ureda disciplinskog tužioca Visokog sudskog i tužilačkog vijeća Bosne i Hercegovine, u okončanom disciplinskom postupku koji je vođen protiv J [REDACTED] D [REDACTED], tužiteljice Tužiteljstva Brčko distrikta Bosne i Hercegovine (broj predmeta UDT: 11-07-6-235/2024).

**II Odbija se** pristup kopiji disciplinske tužbe Ureda disciplinskog tužioca Visokog sudskog i tužilačkog vijeća Bosne i Hercegovine, u disciplinskom predmetu koji je u toku, a koji se vodi protiv J [REDACTED] R [REDACTED], sutkinje Općinskog suda u Tuzli (broj predmeta UDT: 11-07-6-538/2024).

## Obrazloženje

Visoko sudsko i tužilačko vijeće Bosne i Hercegovine (u daljem tekstu: VSTV BiH/Vijeće) je, dana 6.8.2024. godine, putem elektronske pošte zaprimilo zahtjev za pristup informacijama Muzaferre Slomić [REDACTED] (u daljem tekstu: podnositeljica zahtjeva), kojim su tražene informacije iz odbijajućeg dijela rješenja VSTV-a BiH broj 01-07-10-51-143/2024 od 13.6.2024. godine, konkretno potvrđene tužbe Ureda disciplinskog tužioca (u daljem tekstu: UDT/Ured) VSTV-a BiH protiv sutkinje R [REDACTED] J [REDACTED] i tužiteljice J [REDACTED] D [REDACTED]. Podnositeljica zahtjeva je navela da traži ponavljanje postupka riješenog navedenim rješenjem, imajući u vidu okončanost predmeta, na način da joj se dostave tražene informacije u preostalom dijelu. U tom smislu, tražila je izmjenu ranije odluke predsjednika VSTV-a BiH u skladu sa vlastitim obrazloženjem o razlozima za neizdavanje traženih postupaka, odnosno, alternativno, postupanje po podnesku kao novom zahtjevu za pristup informacijama.

Razmatrajući predmetni zahtjev za pristup informacijama, odlučeno je kao u dispozitivu rješenja iz sljedećih razloga:

Vijeće je, rješavajući u predmetnom zahtjevu, prethodno utvrdilo da raspolaže traženim informacijama, kao i da iste predstavljaju informacije u smislu odredbe člana 5. Zakona o slobodi pristupa informacijama na nivou institucija Bosne i Hercegovine (u daljem tekstu: ZOSPI BiH).

Odlučujući u odnosu na tačku I izreke rješenja, VSTV BiH je odobrio pristup traženoj informaciji, u smislu dostavljanja elektronskom poštom kopije anonimizirane disciplinske tužbe Ureda, u disciplinskom postupku protiv sutkinje R. J. koji je okončan u međuvremenu, i to u vremenskom periodu između datuma donošenja inicijalnog rješenja u vezi istovrsnog zahtjeva broj 01-07-10-51-143/2024 od 13.6.2024. godine i datuma podnošenja ovog zahtjeva za pristup informacijama.

Naime, Vijeće je, odlučujući u ovom dijelu zahtjeva u obzir uzelo odredbu člana 6. stav (1) ZOSPI-a BiH, koja otvorenost i javnost informacijama pod kontrolom institucija BiH propisuje kao pravilo, osim ako je neobjavljivanje u potpunosti opravdano i zasnovano na zakonom propisanim izuzecima.

U tom smislu, utvrđeno je da odredba člana 19. stav (2) ZOSPI-a BiH propisuje da se pristup informacijama može ograničiti s ciljem zaštite privatnosti fizičkih lica, zaštite ličnih podataka korisnika i trećih lica, u skladu sa zakonom kojim se uređuje zaštita ličnih podataka. Budući da tražene disciplinske tužbe sadržavaju lične podatke koji uživaju zaštitu u skladu sa Zakonom o zaštiti ličnih podataka, odobren je pristup informacijama u smislu dostave disciplinskih tužbi uz ograničenje utemeljeno na odredbi člana 19. stav (2) ZOSPI-a BiH u pogledu anonimizacije ličnih podataka sadržanih u njima.

Odlučujući u odnosu na tačku II izreke rješenja, utvrđeno je postojanje ograničenja pristupa traženim informacijama u odnosu na dostavljanje kopije disciplinske tužbe Ureda u disciplinskom predmetu koji je u toku. Naime, zakonodavac je, odredbom člana 19. stav (5) ZOSPI-a BiH, propisao da će institucija BiH ograničiti pristup informacijama koje se tiču jednakosti stranaka u sudskim postupcima i efikasnosti pravosuđa, postupaka koje vode nadležni organi u, između ostalog, disciplinskim postupcima za vrijeme trajanja tih postupaka, osim ako posebnim zakonom nije drugačije propisano i ako bi se objavljivanjem informacije onemogućilo efikasno, nezavisno i nepristrasno izvršenje odluke ili sankcije institucije BiH.

Imajući u vidu navedenu odredbu člana 19. stav (5) ZOSPI-a BiH, Vijeće je cijeno da u pogledu osiguravanja javnosti u odnosu na sadržaj disciplinskih tužbi u predmetima koji su u toku postoji opravdan i razuman rizik da bi se, odobravanjem zahtjeva u tom dijelu, moglo uticati na efikasnost, nezavisnost i nepristrasnost u odlučivanju u predmetnim postupcima za utvrđivanje disciplinske odgovornosti.

U tom smislu, utvrđeno je postojanje zakonom propisanog ograničenja u pogledu javnosti informacija pod kontrolom javnog organa. Odlučujući o zahtjevu u ovom dijelu, proveden je i test razmjernosti i javnog interesa u skladu sa članom 20. ZOSPI-a BiH, odnosno uzeta je u obzir svaka korist i svaka šteta koja bi mogla proizaći ukoliko bi Vijeće dostavilo traženu informaciju, bez obzira na utvrđeni izuzetak propisan zakonom te je odlučeno da je zaštita procesa donošenja odluka VSTV-a BiH u disciplinskim predmetima, kao njegova kontinuirana i osnovna nadležnost propisana u članu 17. tačka (4) Zakona o VSTV-u BiH, primarna u odnosu na javni interes, stoga je zahtjev za pristup informacijama u dijelu tačke III izreke odbijen.

Postupajući po zahtjevu podnositeljice, a u skladu sa svim gore navedenim, odlučeno je kao u dispozitivu ovog rješenja.

#### **Pouka o pravnom lijeku:**


Protiv ovog rješenja podnositeljica zahtjeva ima pravo podnijeti žalbu Žalbenom vijeću pri Vijeću ministara Bosne i Hercegovine u roku od 15 dana od dana prijema istog, a može se izjaviti i na zapisnik kod VSTV-a BiH. Žalba se podnosi putem VSTV-a BiH, a na istu se

shodno odredbama Zakona o administrativnim taksama („Službeni glasnik BiH”, br. 16/02, 19/02, 43/04, 8/06, 76/06, 76/07 i 98/12), plaća taksa u iznosu od 10 KM, po tarifnom broju 2. Tarife administrativnih taksi.

Ukoliko Žalbeno vijeće ne odluči po žalbi u roku od 30 dana od dana prijema žalbe, podnositeljica žalbe ima pravo pokrenuti upravni spor pred Sudom Bosne i Hercegovine zbog šutnje administracije.

Prilog:

- Anonimizirana disciplinska tužba iz tačke I izreke rješenja



Dostavljeno:

1. Podnositeljici zahtjeva
2. Uredu disciplinskog tužioca VSTV-a BiH
3. U spis

